



Gabriela Tomaschett e la Casa Depuoz

La Uniun Casa Depuoz a Trun ha fatg ina svieuta annuala da rund 10 milliuns francs.

3



Scuol ed il scandal da cartels

Scuol lascha sclerir sche la vischnanca ha patì donn en connex cun l'affera da cartels.

7

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch



Premiera gartageda a Coira cun en public incanto.

FOTO G. N. STGIER

Per veias e giassas

■ (anr/gns) Igl è puspe schigliunsch. Anc anfignen igl mez d'avost è la gruppa cumedianta digl Origen Festival Cultural sen turnea tras igl antier cantun ed er ordvrat chel. La «Commedia Origen» preschainta igl teater burlesc «Maestro e Margherita»

sen fundamaint digl roman digl scribent russ Michail Bulgakov. Humor, acrobatica, solt, beffas, cant e musica, tot chegl cumpiglia igl toc cuagl qual la gruppa gira per veias e giassas.

> PAGINA 2



Tumasch e Seraina Planta han gnü da chefar i'ls ultims nouv ons culla güstia grischuna.

FOTO F. ANDRY

Ils Plantas laschan per bun

■ (anr/fa) L'ultim chapitel dal «Blauzungen-Impfkrimi» es raggiunt. Tumasch e Seraina Planta han decis da schmetter da cumbatter culs güdischs. Causa ch'els nu laivan laschar vaccinar lur bescha cunter la malatia da la lingua blava vaiva da l'on 2009 il chantun sforzà da far quai. Il pèr Planta chi maina il bain Chauenas sper Scuol ha portà plont. Daspö nouv ons d'uran uossa las cun-

taisas giuridicas. In mardi han ils Plantas e'ls commembers da l'uniun «Blaudistel, Verein für eine wesensgemässe Landwirtschaft» invidà ad amis e rapreschantants dals mezs da massa stül bain Chauenas. Il pèr ha comunicà chi hajan decis da laschar per bun e da schmetter da cumbatter culs güdischs grischuns e svizzers.

> PAGINA 7

Fiasta da s. Mudest a Sumvitg

■ (anr/ff) In pievelun ha assistiu alla fiasta patrocina dalla pleiv da Sumvitg la dumengia vargada. La presenza da sia eminenza cardinal Baslios Cleemis dall'India ha bein effectua ch'ina fuola da cartents ei stada presenta. En siu priedi ha il cardinal fatg attents che Diu ei buca sulet presents en in baghetg sco en basel-

gia, mobein el cor dil carstgaun, leu nua ch'ei vegn aviert igl esch ad el per entrar. La fiasta pompusa ei stada enramada d'in survetsch divin solemn, dad ina processiuon tradiziunala e dalla benedicziun dils presents sin il plazscola.

> PAGINA 4

Persistent pil moviment

A Trin ei igl emprem parc da moviment dil Grischun sesaviarts

DAD AUGUSTIN BEELI / ANR

■ La surfatscha dalla Val Bergla a Trin ei aschi gronda sco ina piazza da ballapei. Cun agid da sponsurs e dalla vischnanca ha la cuminonza d'interess Sportkids da Trin realisau leu in project da generaziuns. Las fundaturas dils Sportkids da Trin Irene Riesch, Petra Casty, Silvia Capatt, Patricia Spreiter e Martina Frischknecht han gudignau avon dus onns il premi Sanitas Challenge. Las dunnas ein turnadas dalla festivitad naziunala culla finamira da buca duvrar ils 20 000 francs mo pils Sportkids. «Nus havein vultu realisar in project per tuttas generaziuns», ha Petra Casty declarau dumengia. En tut han las dunnas stuiu rimnar 200 000 francs per realisar lur visiuon. Entteifer paucs meins han ellas giu finanziau il project. Uniuns dil vitg han finanziau mingamai in urdein e numerus fautors e donators han susteniu l'ovra. «Jeu selegrel nungetg dil success da quei project», ha il gerau Maurus Caftisch sincerau a caschun dall'inauguraziun. Dumengia ha el surpriu uficialmein per la vischnanca da



La suprastonza dalla cuminonza d'interess Sportkids Trin ha plascher dil project da generaziuns: Irene Riesch, Patricia Spreiter, Silvia Capatt, Petra Casty e Martina Frischknecht (da sen.).

FOTO A. BEELI

Trin la responsabladad per l'atrazziun nova. Thierry Jeanneret, menader digl Uffeci cantunala da sport, e Hanspeter Brigger, menader dil program «moviment e nutriment» digl Uffeci cantunala da sanadad, han getg ch'il project da Trin vali sco pilot per ulteriurs

parcs da moviment el Grischun. Quel da Trin ei aunc uss unics.

> PAGINA 5

Scola da talents Surselva

■ (anr/ac) Cun ina acziun da crowdfunding recaltga la Scola da talents Surselva daners per ina acziun da giubileum. Ella vul porscher support sportiv allas ulteriusas scolas naven dall'entschatta dil niev e dieschavel onn da scola igl uost 2018. La presiun da spargnar el scolaresser dalla vischnanca dad llanz/Glion ha intimau la Scola da talents Surselva dad ir novas vias per recaltgar daners per lantschar in project. Igl uost 2018 entscheiva la scola siu dieschavel onn da scola, in motiv per la scola da lantschar in'acziun da giubileum.

Tenor il meinascola David Halser vul la Scola da talents tonscher vinavon las enconuschientschas principalmein sil sector sportiv ed envida las ulteriusas scolas ad ina concurrenza sportiva che cuoza igl entir onn da scola. Per finanziau l'iseglia sportiva e metter ella a disposiziun allas scolas ha la Scola da talents Surselva lantschau ina acziun da crowdfunding. Dils 5000 francs avisai ein strusch 3000 empermess, l'acziun sur la plattafuorma digitala cuoza aunc diesch dis.

> PAGINA 3

Capeder e Schmid candideschans

Elecciuon remplazzonta pil post da deputau el cumin Lumnezia

■ (mc) Suenther che Marcus Caduff ei vegnius eligius honorificamein ella regenza ei sia sutga da deputau el cussegl grond vegnida libra. Per quei mandat candideschans uss ils dus suppleants ch'ei vegni eligi ils 10 da zercladur. La Partida cristiana democratica dalla Lumnezia ha nominau gliendisigs sera ad Uors

Curdin Capeder (40) da Cumbel e Stefan Schmid (47) da Val Sogn Pieder. Omisus han absolviu la scolaziun agricola da meister-pur. Capeder fa aunc adina il pur a Cumbel ed ha realisau ina tratga da pèschs a Silgin ed ina stizun a Cuera. El ei staus ils davos quater onns suppleant dil cussegl grond. Actualmein eis el commember

dalla suprastonza communal da Lumnezia e parsura dall'Uniun purila sursilvana. El haveva fatg las biarvas vuschs sco suppleant.

Era il secund candidat Stefan Schmid ei staus pur da clamada ed ei era staus engaschus en giuvens onns en differentas societads purilas da Val. Per motivs da sanadad ha el denton stuiu ceder sia activitad sco pur ed ei oz engaschus tier las Auas da Val sco emploiau responsabel per la segitad. Dapi sis onns presidescha Schmid la vischnanca gualsera da Val S. Pieder.

Sin proposta dalla suprastonza ha la pcd Lumnezia decidiu péz a cup cun ina vusch differenza dad ir cun dus candidats en l'elecciuon. Tenor il parsura dalla pcd Lumnezia Gian Derungs vul ins porscher al suveran la pusseivladad dar far ina vera elecciuon denter dus candidats qualificai. Damai ch'omisus candidats eran eligi sco suppleants resta quel che croda speras giu tier l'elecciuon da deputau suppleant.

Secapescha ch'ulteriuras candidaturas d'alturas gruppaziuns ein buca diltut exlausas. L'elecciuon remplazzonta ha liug igl 1. da fenadur 2018.



Curdin Capeder (sen.) e Stefan Schmid (dretg) ein vegni nominai dalla pcd Lumnezia sco candidats per il cussegl grond.

FOTO M. CABALZAR



30025



9 771424 749004

Servetsch d'abunents e da distribuziun: tel. 0844 226 226 mail: abo@somedia.ch